

Сийрат дарслари (78-дарс). Набий алайҳиссалом нима қилган бўлсалар, шуни қил!



13:47 / 27.03.2020 2066

345. Алий ибн Абдурроҳман Муовиййидан ривоят қилинади:

«Абдуллоҳ ибн Умар менинг намозда майда тошларни ўйнаётганимни кўрди. Намозни тугатганда мени бундан қайтарди ва: «Расулуллоҳ соллаллоҳу алайҳи васаллам нима қилган бўлсалар, шуни қил», деди. «Расулуллоҳ соллаллоҳу алайҳи васаллам қандай қилар эдилар?» дедим. «У зот намозда ўтирсалар, ўнг кафтларини ўнг сонлари устига қўяр эдилар. Бармоқларини тугар эдилар ва бош бармоқдан кейин келадигани билан ишора қилар эдилар. Чап кафтларини чап сонлари устига қўяр эдилар», деди».

Муслим ривоят қилган.

346. Саъд ибн Абу Ваққос розияллоҳу анҳудан ривоят қилинади:

«Расулуллоҳ соллаллоҳу алайҳи васалламнинг ўнг тарафларига ва чап тарафларига салом беришларини кўрар эдим, ҳатто ёноқларининг оқи кўринар эди».

Муслим ривоят қилган.

347. Абдуллоҳ ибн Масъуд розияллоҳу анҳудан ривоят қилинади:

«Набий соллаллоҳу алайҳи васаллам ўнглариға ва чаплариға салом берар ва: **«Ас-Салому алайкум ва раҳматуллоҳ, ас-Салому алайкум ва раҳматуллоҳ»**, дер эдилар».

Термизий, Насоий, Ибн Можа, Ибн Хузайма ва Ибн Ҳиббон ривоят қилишган.

«Расулуллоҳ соллаллоҳу алайҳи васаллам» китобидан